

Gobernador Freddy Refunjol, den loke ta su ultimo discurso pa Aña Nobo

Polarisacion no ta contribui na adelanto di Aruba

Tambe el a hala atencion p'e forma cu prensa ta funciona

DIABIERNE ultimo, Gobernador Freddy Refunjol tabatin su recepcion di Aña Nobo, cu manera e mes a bisa, cu esaki t'e ultimo cu e ta celebra como Gobernador. E tabata acompaña pa su señora y 4 yiunan.

Loke tambe cu a hala tencion e anochi aki, pa prome biaha, por a mira practicamente mayoria miembro di Consejo di Minister presente, y igualmente varios miembro di Parlamento. Tambe nos a mira presencia di ex Prome Minister Nel Oduber, kende for di despues di su retiro, nunca mas a atende un receptie di Gobernador. Den su discurso, cu nos a keda di haya den fin di siman, pero no a tuma lugar, awe nos kier toca parti di e discurso cu a hala nos atencion. E recepcion

aki a tuma lugar na Hilton Aruba Caribbean Hotel.

Un di e temanan cu sigur a haya atencion den discurso di Gobernador Freddy Refunjol, t'e constante polarisacion den mundo politico. "Constante diferencia di opinion y comprendemento den partidonan politico, ta percura pa politisacion y polarisacion den nos comunidad."

Di acuerdo cu Gobernador Refunjol: "Cu tempo polarisacion ta conduci na escalacion."

E representante di Rey no por aproba e destruccion di edificio di Parlamento di Aruba.

Esaki ta algo cu nunca mas lo mester sosode den nos democracia. E tabata inevitable cu Gobernador lo

a haci mencion di e suseso aki.

Esaki tabata un experiencia amargo, unda e destruccion di Parlamento, cu ta cas di nos democracia.

Gobernador Refunjol a considera esaki como "un suceso masha scur mes, algo cu nunca mas lo mester sosode den nos democracia."

Segun Gobernador, "nos no por nenga cu na Aruba relacionnan ta polarisa den forma creciente. Y cune, Gobernador a mostra tambe e peliger cu esaki por tin pa nos industria turistico, cu t'e pilar di nos economia.

"Polarisacion ta un menasa pa nos 'One Happy and Safe Aruba'." Gobernador a recorda, cu si nos no percura pa tur cos ta bon, nos turismo lo sufrí. "Turismo ta duna resultado ora tin tranquilidad, paz, seguridad y estabilidad."

Na nos opinion, nos por a sinti cu e discurso aki no a cay na agrado di e.o. ex Prome Minister Nel Oduber y di lider di MEP, Evelyn Wever Croes, kendenan a bandona sala, unabes cu Gobernador a finalisa su discurso.

PRENSA

Prensa tambe a haya atencion di Gobernador Refunjol den su discurso. El a bisa cu: "Libertad di expresion ta sagrado pero esaki no ta un 'vrijbrief' pa lastima, lesiona, herida, ofende of pa kibra e otro." Sr. Freddy Refunjol hopi directo y cu palabranan conciso, a mostra su puntonan durante su discurso diabierna anochi na ocasion di su recepcion di Aña Nobo.

Manera Gobernador Fredis

Refunjol a bisa den su discurso: Awe mi ta manda un mensahe fuerte pa tanto e medionan di comunicacion, como esnan cu ta expresa nan mes riba rednan social.

Libertad di expresion di opinion ta algo sagrado y ta hancra den nos constitution, sinembargo, esaki no ta un 'vrijbrief'.

Mi ta ripiti, esaki no ta un 'vrijbrief' pa lastima, lesiona, herida, ofende of pa kibra e otro."

Di acuerdo cu Gobernador, un prensa liber ta contribui na libertad di expresion y na un debate publico constructivo. Pues prensa ta hunga un rol importante den informa, educa nos comunidad. Na final di e tema ey, e mensahe mas fuerte mes a bin.

"No tumami na malo, pero mi tin cu bisa cu mi ta haya e forma brusco, e forma fresco di e debate den medionan (social) aña pasa alarmante. Mi ta a pidi mes momento p'esaki por ta diferente den 2016".

GOBERNADOR NOBO

Manera menciona, Freddy Refunjol a bisa, cu esaki tabata su ultimo discurso como Gobernador na ocasion di Aña Nobo. Esey a pone cu hopi hende tabata puntra ta kende lo bira e proximo Gobernador? Masha nomber tin meniona, pero ta keda na Prome Minister Mike Eman pa cuminsa cu e proceso pa presenta e candidatonan.

Maske cu esaki ta su ultimo discurso pa Aña Nobo, tur cos ta indica cu e actual Gobernador, Freddy Refunjol lo celebra ainda, celebracion di Aña di Rey e aña aki na april, pasobra te na luna di mei, un Gobernador nobo lo tuma asiento.

